


En memoria da hotelier

Benedetg Beer-Koller, Tschamut



(Corr.) Igl ei vargau biabein 5 meins dapi ch'il senior da Tschamut, Benedetg Beer-Koller, ha saviu festivar siu anniversari dad 85 onns. Ins ha fatg dueivla menziun da quella fiasta ella Gasetta Romontscha cun giavischar al giubilar Benedetg ventira e benedicziun per ses 85 onns e bials dis da grazia cun sia consorta e famiglia.

Quels dis da grazia e ventira han priu in'anetga fin all'entschatta dil meins da mars vegnend il Benedetg tuccaus d'ina leva daguota, ch'ei silsuenter serepetida e ha caschunau la mort da nies preziaz convischin. Igl ei stau commuentont co el ha realisau la situaziun e mirau en fatscha alla mort ruasseivlamein, en resignaziun e cun fatscha contenta e rienta. El era semtgaus per quei impurfont pass dalla veta. Buca tuts han la grazia da saver sparter da quest mund aschi consolai e beai. Tut era preparau ed ordinau dil car-

defunct, perfin ch'ins hagi da metter el en bara ella nova caplutta da morts ella baselgia da s. Vigeli a Sedrun. El ei gl'em-prem defunct, ch'ei vegnius piazzaus en quei sogn liug.

Benedetg Beer ha surpriu il hotel «Rheinquelle» a Tschamut ils 28 da matg 1941 ensemens cun sia consorta Emilia. El ei buca vegnius sisum la Surselva senza la necessarias premissas da hotelier. A Chartres en Frontscha ha el fatg gl'emprendissadi da pasterner-patissier. Probabel ha el era acquistau leu la fina demanonza e cordialitat. Igl emprendissadi da cuschinier ha il defunct fatg el hotel Disentiserhof a Mustér. Sias ulteriuras staziuns e pazzas da lavour ein stadas a Landquart el buffet dalla staziun, a Puntraschigna ed a Turitg el hotel Hegibach, nua ch'el ha surviu a nies convischin Lucas Berther p.m. Anno 1932 eis el s'engaschaus sco capocuschinier el hotel «Hecht» ad Appenzell ed ha fatg leu enconuschiantscha cun Emilia Koller, feglia d'in ustier. Suenter ina dimora da 5 onns ad Appenzell seperfecziunescha el aunc en divers hotels a s. Gagl e Basilea. L'aua dil Rein resveglia l'encarschadetgna el cor dil giuven Grischun ed el seresolva da turnar ella patria. Cun el pren ella era sia cara consorta Emilia per secasar definitivamein a Tschamut.

Sigir era gl'amicabel hotelier Benedetg Beer enconuschents ad ina gronda part da nies pievel romontsch. — Il combat d'existenza ei staus grevs ils emprems onns leusi ell'emprema casa spel Rein. Onns d'uiara e pupira ed ina casa d'albiert vita senza il necessari inventari. Mo gl'ei iu. Grazia alla cordialitat, survetscheivladad ed excellenta cuschina ei il hotel a Tschamut gleiti vegnius enconuschents. — Ina

gronda part dil continuau e favoreivel svilup ei senza dubi d'attribuir al sustegn dalla capavla consorta, ch'ei segidada cun siu mariu en dis da sulegl ed umbriva.

Il plaz da lavour dil Benedetg era la cuschina. Dumandond suenter ses receipts scheva el adina: «Ins sto cuschinat cun carezia e plascher e survir ils hosps da tut temps.» Quella premura e devisa ha purtau il giavischau success. — Ina retenida ha ei dau gl'onn 1951, cura ch'ina nauscha lavina ha sfraccau ensemens la sala annexa dil hotel. Senza gronds lamentems e plein curascha ha'l Benedetg priu a mauns la renovaziun e puspei fatg flurir la fatschenta. Parallel cul svilup turistic ei il diember da hosps s'augmentaus considerablamein, aschia ch'ins ha plaunsiu saviu modernisar empau ils stabiliments ed anflau ina bona basis pil futur.

La lètg dalla famiglia Beer-Koller ei stada benedida cun 5 affons. Ils geniturs han giu tut aparti grond quitau per l'instruziun ed educaziun da quels. Quei ei bein il motiv, ch'els han giu ton sustegn ed agid dils lur. Aschia han els saviu surdar ruasseivlamein e plein confidanza la fatschenta als vegnentsuenter.

Benedetg Beer ha surviu duront ca. 30 onns alla caplutta da s. Clau a Tschamut sco ugau e caluster. — El ei era staus representant dils dadens gl'uaul el cussegli da scola dalla vischnaunca da Tujetsch. Cordial engraziamenti per quei engaschai. — Fagend ina viseta a Tschamut quet'ins aunc adina da saver dar ina paterlada cul Benedetg. Mo van encuirir. La largia ei cheu, il baun vits. El ha anflau siu davos ruaus el sameri sper la baselgia da s. Vigeli a Sedrun. Il Segner detti al car defunct la pagaglia meritada. Sd.